

LA CARTA DEL APOSTOL SAN PABLO A LOS EFESIOS

1 ¹Wejrtĉha Pablutqui, anĉhucaquin tii cartal cjijrĉcuĉha. Wejrqui Jesucristuĉ illzta apostoltĉha Yooz munaŋpi jaru. Anĉhucui Yooz partir Źoŋinacĉhucĉha, Efeso wajtquiz kamŋinaca. Niĉaza anĉhucui Jesucristuĉquin kuz tjaachi Źoŋinacĉhucĉha. ²Uĉhum Yooz Ejpmi, uĉhum Jesucristo Jilirimi anĉhucaquiz zumaj yanapla, niĉaza anĉhucaquiz cuntintu kuzziz walikaj kamkatla.

YOOZ EJPQUI UĊHUMNACALTAJAPA ZUMA PINSIĊHA

³Uĉhum Jesucristo Jilirĉ Yooz Ejpĉtajapa honoral waytuĉha wejrqui. Uĉhum Yooz Ejpqui uĉhumnacaquiz ancha zuma favoranaca paachiĉha, Jesucristuĉ partiquiz cjiskatchiĉ cjen. Uĉhumqui arajpach Yooz wajtchiz Źoŋinacĉhumĉha. Jalla niĉtiquiztan tĉapaman favoranaca uĉhumnacaquiz paachiĉha Yooz Ejpqui. ⁴Tuquitanpacha ima tii muntu kalltican Yooz Ejpqui Jesucristuĉ cjen uĉhumnac illziĉha, niĉtajapa t'acĉta cjisjapa, niĉaza niĉ yujcquiz ana ujchiz niĉaza zuma cjisjapa. ⁵Yoozqui niĉ okzŋi kuzziz cjen, tuquitanpacha tantiichiĉha, uĉhumnaca niĉ partiquiz cjisjapa, niĉ maatinacjapa. Jesucristuĉ

cjen uĉhumqui Yooz maatinacĉhumĉha. ⁶Niĉaza Yooz Ejpqui niĉ ancha okzŋi kuz tjeeziĉha, niĉ persun honora waytita cjisjapa. Niĉ k'ayi Majchiĉ cjen uĉhumnacaquiz nuĉukaz walja okziĉha Yooz Ejpqui. ⁷Jesucristuĉ ticziĉ cjen, Yoozqui uĉhum liwriichiĉha. Jalla nuĉ liwriiĉcu uĉhum ujnaca pertunchiĉha, niĉ zuma okzŋi kuzquiztan. ⁸Yoozqui uĉhumnacaltajapa niĉ okzŋi kuz walja tjeeziĉha, zuma favoranaca paacan. Jalla nuĉ zuma favoranaca paacan, Yoozqui uĉhumnacaquiz tĉapa niĉ puntunaca intintazŋi cjiskatchiĉha. ⁹Niĉaza Yoozqui niĉ tuquita chjojta pinsitanaca uĉhumnacaquiz zizkatchiĉha. Niĉ kuzcama pinsita jaru, jalla nuĉ uĉhumnacaquiz zizkatchiĉha. ¹⁰Yoozqui niĉ pinsita tjuŋquiz niĉ persuna pinsitaqui cumpliskataquiĉha. Jalla niĉ pinsita jaru Yoozqui tĉapa arajpachquin Źejlŋinacami, niĉaza tĉapa tii yokquiz Źejlŋinacami tĉappachaĉ juntĉapaquiĉha, Cristuĉ mantuquiz cjisjapa.

¹¹Jesucristuĉquin kuzziz cjen wejrnac judio Źoŋinacaqui t'acĉtaĉha. Yoozqui persun kuzcama pinsita jaru nuĉ wejrnac t'acziĉha. Yoozqui tĉapa niĉ pinsitacama cumpliskatĉha. ¹²Wejrnacqui anĉhucĉ tuqui Jesucristo tjewziĉha. Wejrnacqui t'acĉta

cjissinča, zuma kamzjapa. Nekztan wejrnacaž zuma kamtiquiztan Yooztajapa juc'anti honora waytitaž cjequiča. ¹³Nižaza ančhucui werar Yooz taku nonžcu Jesucristužquin kuz tjaachinčhuczakazza. Jalla nižtiquiztan liwriita cjissinčhuczakazza. Nekztan Cristuž partiquiz želan, Yoozqui niž Espiritu Santo ančuca kuznacquiz luzkatchiča. Tuquitanpacha Yoozqui niž Espiritu Santo cuchanžquizjapa taku tjaachiča. Nižaza Espiritu Santuqui ančuca kuzquiz žejltiquiztan, ančuca kuzquiz Yooziž chimpupapanča. Nii kjanapacha tjeeža, ančhucqui Yooz partir žoñinacčhucča, jalla nii. ¹⁴Espiritu Santo učhumnaca kuzquiz cjen, učhumqui zizza, ultimpacha arajpach Yooz irinsa tanznaquiča. Čhjulatorat tjapa Yooz partir žoñinaca liwriita cječhaja, jalla nii ora nii irinsa tanznaquiča. Tjapa nižta zumanaca učhumnacaltajapa pinsichiča Yoozqui, nižtajapa juc'ant honora waytita cjisjapa.

PABLUŽ MAYIZITA

¹⁵Jilanaca, cullaquinaca, ančuqui Jesucristo Jiliržquin kuzzizpanča, nižaza parti criichi žoñinacžtan zuma munaziñi kuzzizpanča. Jalla nižta zizcu, ¹⁶wejrqui ančucaž cjen tirapan Yoozquin sparaquiz cjiwča. Nižaza Yoozquin mayizican ančhucaltajapa mayizuča, ančhuc Yooz puntu zuma zizñi cjisjapa. ¹⁷Učhum Jesucristo Jilirž Yooz Ejppžquinpan mayizuča. Yooz Ejppqui juc'ant chekan honorchizza. Ančhucaltajapa mayizuča, Yooz ančhucacquiz tsjii zizñi kuzziz cjiskatajo, nižaza mayizuča Yooziž tjeežtanaca intintazñi kuzziz cjiskatajo. Jalla nižta kuzziz kamaquiz niiqui, juc'anti Yooz puntunaca zizñi cjequiča. ¹⁸Nižaza juc'anti Yooz puntunaca intintazñi

kuzziz cjequiča. Zuma intintazñi cjequiz niiqui, arajpachquin kamz puntu juc'anti zizaquiča. Yoozqui učhumnaca kjawziča, arajpachquin kamzjapa. Jalla nicju kamzjapa učhumqui tjewža. Arajpachquin Yooztan kamzqui juc'ant ancha zuma wali irinsažtakazza. Jalla nii irinsa Yoozqui tjapa niž partir žoñinacžquiz tjaaquiča. ¹⁹Nižaza wejrqui mayizuča, ančhucqui Yooz aziž puntuiztan juc'anti intintazjapa. Učhum Yoozqui juc'ant walja azzizza, čhjultakquiztanami. Niiž aztan Yoozqui učhum kuznaca campiiskatchiča, ew kamañquiz kamzjapa. Yoozqui niž jacatatskatñi aztan učhum kuznaca campiichiča. ²⁰Yooz Ejppqui niž walja azi tjeeziča, Jesucristo ticziquiztan jacatatskatcan. Nižaza niž aztan tjeeziča arajpachquin niž žew latuquiz Jesucristo tjulžcan, nižtan chica mantizjapa. ²¹Yoozqui tjappacha Cristuž mantuquiz utchiča, tjapa jilirinacami, tjapa mantiñinacami, tjapa mantiñi poderchiznacami, tjappacha Cristuž mantuquizcama uchtača. Tii timpuquiz žejlñinacami, nižaza jazta timpuquiz tjonñi mantiñinacami tjappacha Cristuž mantuquiz uchtača. ²²Yoozqui mantichiča tjappacha Cristuž mantuquiz cjisjapa. Nižaza Yooziž mantitiquiztan nii tjapa mantiñi Cristuqui niž icliz žoñinacžtajapača. ²³Cristuž partir žoñinacaqui nižtan tsjii kuzziz žejlča, nižaza tsjii curpuchiztakazza. Tjapa Cristuž partir žoñinacaqui Cristuž kamañchizpankazza. Nižaza Cristuž cjen tjapa čhjultakimi tii muntuquiz žejlča.

YOOZ OKZÑI KUZZIZ CJEN ŽOÑINACAQUI LIWRIITAČHA

2 ¹Jaziqui Yoozqui ančhucacquiz ew kamañchiz cjiskatchiča.

Tuquiqui ančhucqui Yooz yujcquiziqui ticzi žoñinacažtakaz želatča ujnaca paachiž cjen, nižaza ana walinaca paachiž cjen. ²Jalla nuž ana wali ujnaca paacan, ančhucqui kamatča ujchiz žoñinacž kamañ jaru. Nižaza ana wali paacan, zajranacž jilirž kuzcamakaz kamatča. Jakziltat ana Yooz kuzcama kamčhaja, jalla niiqui zajranacž jilirž kuzcamapankaz kamčha. Nii ana wali zajra jiliriqi žoñinacžquiz ana wal kamañchiz cjiskatča. ³Tuquiqui učumqui ana wal kamañchiz zakaz kamatča, Yooz kuzcama ana kamcan. Učumqui persun kuzcamakaz kamatča. Nižaza učum ana wali pecni kuz jaru kamatča. Nižaza učum ana wali pinsitanacž jaru kamatča. Jalla nižtiquiztan učumqui Yooz casticta cjichucapantača, jaknužt Yoozqui parti ujchiz žoñinaca casticačhaja, jalla nižta. ⁴Jalla nižta ana wali kamanami, Yoozti zuma okzni kuztan učumnacaquiz okziča. Nižaza učumnacatan munaziča. ⁵Nuž zuma okzni munaziñi kuzziz cjen, Yoozqui učumnacaquiz Cristužtan zuma kamañchiz cjiskatchiča. Yooz okztiquiztankaz ančhucqui liwriitača. Tuquiqui uj paachiž cjen, učumqui Yooz yujcquiziqui ticzi žoñinacažtakaztača. ⁶Jaknužt Jesucristuqui ticžcu Yooz aztan sepulturquiztan ulantčhaja, jalla nižta irata učumqui Yooz aztan ana wal kamañanacquiztan ulanchinčhumčha. Nekztan Cristužtan tsjii kuzziz cjen Yoozqui učumnacaquiz Cristužtan chica honorchiz cjiskatchiča. ⁷Jalla nuž Yoozqui cjiskatchiča, wiñayjapa niiž ancha zuma okzni kuz tjeezjapa. Jesucristuž cjen Yoozqui učumnacaquiz zuma kuztan munazicha. ⁸Yooz okzni kuzziz cjen,

nižaza ančhucž Jesucristužquin kuz tjaachiž cjen, ančhucqui liwriitača. Jalla nii liwriitaqui anača ančhucž cjenauqui. Antiz Yooz cjenpankazza nii liwriitaqui. Jalla niiča ančhucquiz liwriiž tjaachiqui. ⁹Ančhucž paata obranacquiztan nii liwriizqui anaž tjonča. Jalla nižtiquiztan anaž jecmi mit kuzziz cjesača. ¹⁰Učumqui Yooz obranacčhumčha. Jesucristužquin kuz tjaachiž cjen Yoozqui učum liwriichiča, zuma kamañchiz cjisjapa. Yoozqui jalla nižta zuma kamañanaca učumnacaltajapa tantiižinchiča, ima nižquiz criñiž cjen. Jalla nii kamañanaca tantiižinchiča, učum zuma obranaca paazjapa.

TUQUI ANČHUCQUI ANATAČHA YOOZ ŽOÑINACA

¹¹Ančhucqui jalla tuž cjuñzna. Ančhuqui anača judfo žoñinaca. Chimputa judfo žoñinacaqui ančhucapuntuquiztanž cjiča, “Ninacaqui janchiquiz ana chimputača. Jalla nižtiquiztan anaž Yooz partir žoñinaca cjesača”. Jalla nuž cjiñiča. Nii judionacača curpuquiz chimputaqui, “Yooz illta žoñi” cjican tjeezjapa. Žoñiž chimputača nii judfo žoñinacaqui. ¹²Nižaza cjuñzna. Tuquiqui ančhucqui ana Cristo pajiñchuctača. Nižaza Israel wajtchiz žoñinacžquiztan yejkchuctača. Nižaza ančhucqui Yooziž tjaata takunaca anaž pajatča. Ujnacquiztan liwriita cjisjapa ana tjewzñi atatča. Tii muntuquiz kamcan ančhucqui anapan werar Yooz pajatča. ¹³Pero anziqi Jesucristužquin kuzziz cjen ančhucqui Yoozquin macjatchinčhucča. Tuquiqui ančhucqui Yoozquiztan ažkquin želatča. Cristuž ticziž cjen, ančhucqui Yoozquin macjatskattača. ¹⁴Cristuž cjen učumnacatan

Yooztan pajaskatchičha. Nekztan zumanskatchičha. Nižaza učhumnacatan parti criichi žoñinacžtan zumanskatchizakazza. Cristuqui judfo žoñinacami ana judfo žoñinacami tsjii partiquizkaz tjappacha cjiskatchičha, niizquin criichiž cjen. Tuquiqui judfo žoñinacaqui yekja wajtchiz žoñinacžtan quintrapanikaztačha. Nižaza yekja t'akapanž nayatčha. Pero anziqúi Yooz partiquiz cjican criichi žoñinacaqui tsjiikazza. ¹⁵ Cristuqui curpuchiz cjican Yooziž mantita lii liwj cumpližcu ticzičha. Jaziqui Cristuž ticziž cjen Yoozqui nii tuqui timpuquiztan kamchi lii tuct'ayskatchičha, tjapa niiž mantitanacžtanpacha. Jalla nekztan Yoozqui judfo criichi žoñinacami ana judfo criichi žoñinacami tjappacha tsjii ew partiquiz cjiskatchičha. Nii ew partiquiz žejlcan, judfo žoñinacžtan yekja wajtchiz žoñinacžtan ana iya quintrasni cjesačha. ¹⁶ Nižaza cruzquiz ch'aweta ticziž cjen, Jesucristuqui judfo žoñinacžtanami yekja wajtchiz žoñinacžtanami pertunaskatchičha. Jaziqui Jesucristuž cjenkazza nii pucultan quintrasni žoñinacžtan Yooztan zuma cjiskatchiqui. Nižaza nii pucultan quintrasni žoñinacaqui tsjii partiquizkaz kamasachha, zuma munazican.

¹⁷ Nižaza Jesucristuž tjonchiž cjen, Yoozquiztan ažkquin žejlñinacžquizimi žcati žejlñinacžquizimi zuma quintunaca paljaytačha. Ninacaqui nii paljayta tjapa kuztan catokaquiz niiqui, jalla nekztan Yooziž pertunta cjesačha. Nižaza ninacžtan Yooztan zumanznaquičha. ¹⁸ Jesucristuž cjen nižaza Yooz Espiritu Santuž cjen judfo žoñinacami ana judfo žoñinacami, tjapa žoñinacaqui Yooz Ejpžquin macjatz atčha. ¹⁹ Jalla

nižtiquiztan ančhucqui anačha iya yekja žoñinacžhucqui, anačha iya Yoozquiztan yekja t'akčhucqui. Antiz Yooz partiquiz kamni mazinacžhucčha parti criichi žoñinacžtan, nižaza ančhucqui Yooz familliquizčhucčha. ²⁰ Učhumqui tsjii pajk kjuyažtakazza Yooztajapaqui. Nii kjuy simintuqui apostolonacačha, nižaza Yooztajapa chiiñi profetanacačha. Nižaza Jesucristupachačha juc'ant chekan maz cuntaqui nii kjuyquiziqui. ²¹ Jesucristuž cjen tjapa criichi žoñinacaqui arubinacažtakazza nii kjuya pirkitaqui. Tjapaman criichi žoñinacaž cjenami tsjii Yooztajapa kjuyakaz kjuytačha. Jesucristuž yanaptaž cjen nii kjuychiz žoñinacaqui tsjan tsjan zuma cjissa, Yooztajapa kamcan. ²² Ančhuc zakaz nii kjuy pirkita arubinacažtakazza parti criichi žoñinacžtan. Jalla nuž učhum Yooz kjuyquiz cjissiz cjen, Yoozqui učhum kuzquiz žejlčha niiz Espiritu Santužtan.

PABLUQUI YOOZ TAKU PALJAYNI ŽOÑIČHA

3 ¹ Jalla nižtiquiztan wejr Pabluqui ančhucaltajapa mayizučha. Wejrqui Jesucristo sirwiñiž cjen tii carsilquiz želučha. Nižaza ančhuc yekja wajtchiz žoñinacžquiz liwriiñi taku paljaytiquiztan zakaz carsilquiz želučha wejrqui. ² Ančhucqui wejt puntuquiztan zizzinčhucžlani. Yoozqui tii apóstol puestuquiz wejr utchičha, ančhucquiz Yooz puntu paljayzjapa, jaknužt Yoozqui okzni kuzziz ančhuc liwrii pecčhaja, jalla nii paljayzjapa. ³ Nižaza ančhucqui zizzinčhucžlani Yoozqui niiz tuquita pinsita takunaca wejtquiz zizkatchičha, jalla nii. Tuquita anapan ziztatačha nii takunacaqui. Nii wejtquiz zizkatta takunaca tuqui ančhucquini tsjii koluculla cijjrčinčha.

⁴Nižaza tii carta liižcu, ančhucqui tantiyašača, wejrčha Cristuž puntuquiztan zuma intintaziñtqui, jalla nii. ⁵Tuqui timpuqui Yoozqui anaž jecžquizimi Cristuž puntuquiztan zuma zizkatchiča. Jazikaz Yoozqui Cristuž puntu zuma zizkatchiča, niiz illzta apostolonacžquizimi, nižaza niiztajapa chiiñi profetanacžquizimi. Niiz Espiritu Santuž cjen nuž zizkatchiča. ⁶Nii tuquita chjojta puntuqui jalla tiiča: Cristuž puntu liwriiñi taku catokchiž cjen, čhjuluz cherchi žoñimi Yooziž liwriitaž cjesača. Tsjii irinsažtakaz nii liwriiz tanznasača. Ana judio žoñinacami Cristuž partiquiz zakaz cjisnasača. Nižaza Cristuž partiquiz žejlcanpacha Yooz tjaata taku tanznasača, liwriita cjisjapa. ⁷Wejrqui nii liwriiñi taku paljayzjapa apóstol puestuquiz uchtača. Jalla nii puestuquiz cjis anal waquizuča. Yoozqui wejr okžcu nužukaz nii puestuquiz wejr utchiča, niiz kuzcama. Yooz poderchiz apóstol kamañ jaru kamuča. ⁸Wejrqui tjapa Yooz partir žoñinacžquiztan upa honorchiz cjis waquizuča. Jalla nuž cjenami Yoozqui wejtquiz apóstol puestu tjaachiča, ana judío žoñinacžquiz Cristuž puntuquiztan ancha zumanaca paljayzjapa. Cristuž puntuqui ancha zumača. Tjapa nii puntuquiztan ana intintazucača. ⁹Yoozza tjappacha paachiqui. Jalla nii Yoozqui wejtquiz niiz tuquita chjojta pinsita cumpjiichiča, tjapa žoñinacžquiz kjanzt'izjapa. ¹⁰Jalla nuž watchiča, tjapa poderchiz espiritudinacami tjapa mantiñi espiritudinacami zizkatzjapa, jaknužt Yoozqui ancha zizñi zizñi pinsichižlaja, nii. Tuquiqui nii arajpachquin žejlñi espiritudinacami ana zuma zizziča nii Yooziž pinsita

puntuqui. Anziqiu criichi žoñinacaž cjen, nii espiritudinacami Yooz tuquita pinsitaqui zizziča. ¹¹Tuquitanpacha Yoozqui nuž zizkatz pecchiča. Jaziqui učum Jesucristo Jiliriz cjen Yoozqui niiz pinsitaqui zizkatchiča. ¹²Nižaza Jesucristuž cjen učumqui Yoozquin macjati atasacha, ana ekscan. Jesucristužquin kuz tjaachiž cjen, učumqui tjup kuztan Yoozquin macjati atasacha. ¹³Jalla niiztiqiztan ančhucquin tuž chiižinžcuča, weriž ančhucaltajapa sufrichiz cjen, ana upa kuzziz cjee. Jalla nuž ančhucaltajapa sufran, ančhucqui juc'ant honorchiz cjequiča.

CRISTUQUI ANCHA ZUMA MUNAZIÑI KUZZIZ

¹⁴Nii Yooziž ancha zuma pinsitaqui cjuñzcu, wejrqui učum Jesucristo Jilirž Yooz Ejpžquiztan mayižinuča. Quillžcu, Yoozquiztan mayižinuča. ¹⁵Yooz Ejpžquiztan tjapa Yooz partiquiz žejlñi familianacami tjuuchizza, arajpachquinami yokquizimi. ¹⁶Yooz Ejpžquiztan mayižinuča, ančuca kuznaca tjupi tjurt'ichi cjisjapa. Yoozqui niiz Espiritu Santuž aztanž cjen, ančuca kuznaca tjupi tjurt'ichi cjiskatasacha. Yoozqui niiz juc'ant zuma kuzquiztan ančuca kuznaca tjurt'ichi cjiskatasacha. ¹⁷Nižaza ančhucaltajapa mayižinuča, Jesucristužquiz juc'ant kuzziz cjejajo. Jalla nuž juc'ant kuzziz cjen, Jesucristuqui ančuca kuznacquiz juc'anti irpaquiča. Jesucristuž irpita cjen, ančhucqui zuma munaziñi kuzzizpanž kamaquiča, tsjii zuma pookñi zkalažtakaz. ¹⁸Nižaza zuma munaziñi kuzziz kamchiž cjen, ančhucqui Jesucristuž zuma munaziñi kuz juc'antiž pajaquiča. Jalla nuž mayižinuča tjapa

criichi žoñinacztajapa. Wejrqui tuž mayižinuča, tjapa criichi žoñinacaqui Cristuž zuma munaziñi kuz zumpacha pajla cjiwča. Zmali pakjiž cjes, nižaza palaž cjes, nižaza lajchaž cjes, jalla niža iratača Cristuž zuma munaziñi kuzqui. ¹⁹Žoñinacaqui Cristuž zuma munaziñi kuz anaž tjapa paji atča. Jalla nuž cjenami Yoozquiztan mayižinuča criichi žoñinaca Cristuž zuma munaziñi kuz zumpacha pajzapa. Jalla nuž pajtiquiztan, ančhucqui Yooz iratapankaz zuma kamañchiz kamaquiča.

²⁰Jaziqui Yoozqui zuma honorchiz cjila. Yoozqui niž aztan učhum kuznacquiz zuma obranaca trabajča. Učhumž mayizitiquiztanami nižaza učhumž pinsitiquiztanami juc'anti zuma kamañchiz kami yanapasača učhum zuma Yoozqui. ²¹Criichi žoñinacž cjenami, Jesucristuž cjenami, Yoozqui honorchiz cjila. Wiñay wiñaya watay wata honorchiz cjila. Jalla nužoj cjila. Amén.

ESPIRITU SANTUŽ CJEN TSJII KUZZIZZA UČHUMQUI

4 ¹Jesucristo Jiliržquiz sirwiñiž cjen carsilquiz želuča. Wejrqui ančhucaquin chiižinžcuča zuma kamañchiz kamajo, jaknužt Yooz kjawžta žoñinaca kamz waquizičhaja, jalla niža. Yooz Ejpqui ančhuc kjawziča niižtajapa kamajo. Jalla tuž kamz waquiziča, ²ana mit kuzziz, nižaza humilde kuzziz, nižaza zuma munaziñi kuzziz, nižaza pasinsichiz kuzziz. Jalla nuž kamz waquiziča. ³Espíritu Santuž cjen, tsjižtan tsjižtan zumanskatz waquiziča. Jaziqui tsjii kuzzizpan cjee. Nužquiz tirapan kuz tjaa. ⁴Tjapa criichi žoñinacaqui Cristuž partiquiz žejlča tsjii curpuchiztakazza. Nižaza tsjii Espíritu Santuchizza. Tjapa

ančhucqui Yooz kjawžtiquiztan tsjiikaz tjewža, arajpachquin Yooztan kamz, jalla nii. ⁵Nižaza tjapa ančhucqui tsjii Jesucristo Jilirchizkazza, nižaza tjapa ančhucqui Jesucristužquin kuz tjaačinčhucča. Jalla nižtiquiztan ančhucqui tsjiikazza. Nižaza tsjii bautismokaz tanzinčhucča. ⁶Nižaza tjapa učhumqui tsjii Yooz Ejpchizza. Učhum Yooz Ejpž mantuquiz tjapa criichi žoñinaca žejlča. Nižaza Yooz Ejpqui trabajča tjapa criichi žoñinacž kuzquiz. Nižaza Yooz Ejpqui tjapa criichi žoñinacž kuznacquiz žejlča.

⁷Tjapa criichi žoñinacžquiz kamañanaca tjaatača, Cristuž pectacama. ⁸Jalla nii puntuquiztan Yooz taku tuž cjiča:

“Arajpachquin ojkan, wacchi
Cristuž atipta presunaca
chjitchiča. Nižaza tii
muntuquiz žejlñi žoñinacžquiz
kamañanaca tjaachiča”.

⁹Yooz takuqui “Arajpachquin ojkan” žkjažt cji? Jalla tuž cjiča: Primeraqui Cristuqui tii muntuquiz chjiwžquichiča. ¹⁰Jalla nii chjiwžquiniqui Jesucristupachača. Nižaza niipachača arajpach kjutñi ojchiqui, juc'ant tsewc arajpachquin. (Jalla nuž Jesucristuqui tsewc ojchichiča, Espíritu Santuž cjen criichi žoñinacž kuznacquiz niipacha žejljapa.) ¹¹Jalla tiža kamañanacchizza criichi žoñinacaqui: apostolonaca kamañchiz, nižaza Yooztajapa paljayñi profetanaca kamañchiz, nižaza liwriñi taku parliñinaca kamañchiz, nižaza icliz irpiñinaca kamañchiz, nižaza Yooz puntu tjaajiñinaca kamañchiz. ¹²Jalla niža kamañanaca tjaachiča Yoozqui, tjapa criichi žoñinaca Yooztajapa zuma kamajo, nižaza Yooztajapa sirwican langznajo, nižaza parti criichi žoñinaca

tsjan zuma kamañchiz cjiskatajo. Criichi žoñinacauqui Cristužtan tsjii curpuchiztakazza. ¹³Nižaza Yooz Ejpqui criichi žoñinacžquiz nižta kamañanaca tjaachiča, Yooz irata zuma cjiscama. Jalla nižta Yooz irata zuma cjican tjapa criichi žoñinacauqui tsjii kuzzizpankaz cjequiča, Jesucristužquiz tjapa kuz tjaacan, nižaza tjapa Yooz Majch puntunaca intintazcan. Jalla nuž Yooz irata zuma cjican, ućhumqui tsjii zuma pajk žoñiztakaz cjequiča. Nižaza jaknužt Jesucristuqui zumapanžlaja, jalla nižta irata ućhumqui zumapanž cjequiča. ¹⁴Jalla nižta zuma kamñi intintazñi cjican, ućhumqui anaž tsjii ocjalažtakaz cjequiča, ćjul ew tjaajintiquizimi criizjapaqui. Nižaza ućhumqui anaž tsjii kjutñi chjichta cjesača. Nižaza ućhumqui nii ana wal mañuz žoñinacžquiz ana incallskataquiča. Nii ana wal žoñinacauqui ćjulumi paača, nižaza chiiča, parti žoñinaca incallzjapa, nižaza tsjii kjutñi chjichjapaqui. ¹⁵Antiz ućhumqui zuma munaziñi kuztan werarapan chiiz waquiziča. Jalla nuž zuma kamcan nižaza zuma chiican, ućhumqui Cristužtan tsjii kuzzizimi tsjii kamañchizimi juc'anti cjisnaquiča. Cristupankazza ućhum jilir achaqui. ¹⁶Ućhumqui Cristužtan tsjii curpuchiztakazza. Tsjii curpuquiz yekja yekja žejlča. Jalla nuž cjenauqui tsjii curpukazza. Jalla nižta iratača Jesucristuž partiquiz žejlñi žoñinacauqui. Yekja yekja želanami, tsjii partiquiz juntjapziča, Jesucristuž cjen. Jesucristuqui ućhumnaca juntjapchiča, nižaza tsjii kuzziz cjiskatchiča, nižaza ew kamaña tjaachiča. Tjapa criichi žoñinacaz zuma kamñiž cjen Cristuž curpuqui tsjan zuma pajktažokazza. Nižaza

porapat zuma munaziñi kuzziz kamñiž cjen, tsjan tsjan wali zumaž cjissa.

EW KAMAÑCHIZZA CRIICHI ŽOÑINACAQUI

¹⁷Jalla nii puntu anćhucaquin chiižinžcuča. Jesucristo Jiliržtan tsjii kuzziz cjican wejrqui anćhucaquin tuž cjiwča: Ana Yoozquin criichi žoñinacauqui ana zuma kamča. Jalla ninacauqui inapankaz persuna pinsitanacž jaru kamča. Jalla nižta irataqui anćhucqui anača kamzqui. ¹⁸Ana criichi žoñinacauqui ana Yooz puntu intintazñi kuzzizza. Zumchiquiz ojklayñi žoñinacača ninacauqui. Ninacž chojru kuzziz cjen, Yooz puntu ana zizza. Jalla nižtiquiztan ana Yooz kamañchizza. ¹⁹Ninacauqui ana wali paaznacquiztan ana azñiča. Nižaza ana wal kamañquiz kuz tjaachiča. Tjapaman ana walinaca paazjapa pecñipanča. ²⁰Pero Jesucristuž tjaajintaqui anača nižta. Jalla niž tjaajintaqui zizza anćhucqui. ²¹Anćhucqui Jesucristuž puntuquiztan nonžcu niž tjaajintaqui catokchinćhucča. Niiž tjaajintaqui werarapankazza. ²²Anćhuca tuquita ana wal kamaña eca. Anćhuca ana wali pecñi kuz jarutača nii kamañaqui. Ana wal kamañchiz kamcan, žoñinacauqui persunpachaž incallča. Ana wal kamaña liwj jayta anćhucqui. ²³Kuznaca liwj campiya, zuma kamañchiz cjisjapa. ²⁴Nižaza Yooz tjaata ew kamañchizpankaz cjisna. Nii ew kamañaqui Yooz irata zuma kamañača. Nii ew kamañ jaru kamcan, ana uj paaquiča, litituma zumaž kamaquiča.

²⁵Jalla nuž kamcan, ana toscar takunaca chiya. Antiz zapa mayni porapat zuma werar takunacžtan parlispanča. Tjapa criichi

žoninacaqui yekja yekja cjenami tsjii curpuchiztakazza.

²⁶Tsjii žawjz tjonanaqui, uj paazquiztan cuitaza. Ana zita žawjz peczqui. ²⁷Anača Satanás diabluž jaru ujquiz tjojtskatz peczqui.

²⁸Jakziltažlaja tjangz pecni kuzziz, nii tjañi zaaz kuz jaytila. Jalla niiqui langz waquiziča persun kjaržtan. Nekztan ganžcu, t'akjir žoninacžquiz onasača.

²⁹Ana wal takunacžtan ana chiya. Antiz zuma takunacžtan chiya, parti žoninaca juc'ant zuma kamañchiz cjisjapa. Jalla nuž chijan nonžni žoninacaqui yanapta cjequiča, zuma kamajo. ³⁰Espíritu Santuqui ančhuca kuzquiz žejlcan Yooz chimputapanča, ultim liwriiz tjuñicama. Jalla nižtiquiztan Yooz Espíritu Santužquiz ana llaquiziskata, ana wali kamcan.

³¹Čhaawjkatni kuz jayta, nižaza culirazni kuz jayta, nižaza žawjžawjz kuz jayta, nižaza žoñi ararñi kuz jayta, nižaza žoñž quintra ana wali chiiñi kuz jayta, nižaza tjapa ana wali kuznaca jayta. ³²Nižta ana wali kuzziz cjenpacha porapat zuma munaziñi kuzziz cjee. Nižaza porapat zuma okžni kuzziz cjee. Nižaza porapat pertunni kuzziz cjee. Jaknužt Jesucristuž cjen Yoozqui ančhucaquiz pertunčhaja, jalla nižta porapat pertunassaquičha.

ZUMA KAMAÑANAC PUNTU

5 ¹Ančhucqui Yooz partiquiz žejlcan Yooz pecta maatinacača. Jalla nižtiquiztan Yooz irata zuma kamañchiz cjee. Yooz kamañchiz yatekaza. ²Zuma munaziñi kuzziz cjee. Jaknužt učumnacatan Cristo munazičhaja, jalla nižta. Učumnacatan munazican, Cristuqui učum laycu ticziča. Jalla nuž ticžcan Cristuqui niiž persun curpu Yoozquin

tjaachiča, tsjii zuma ofrendažtakaz, nižaza tsjii zuma wilanažtakaz.

³Ančhucqui Yooz partiquiz cjicanaqui, anača tsjii adulteriuquiz ojklaz pinsisqui. Nižaza anača čhjul anawalinacami pinsisqui. Nižaza anača čhjultakimi zmazqui. Nižta anawalinaca anapanž pinsis waquiziča. ⁴Anača azzuc takunaca chiichiizqui. Nižaza anača ina takunaca chiichiizqui. Nižaza anača ana zum takunaca chiichiizqui. Jalla nižta chiichiiznacaqui anaž učumnaca chiichiiz waquiziča. Antiz zuma takunacžtan chiichiiz waquiziča. Yoozquin sparaqiz cjis waquiziča. ⁵Ančhucqui tuž zizza. Jakziltat adulteriuquiz ojklayni cječhaja, jalla niiqui anaž arajpach wajtquin luzasača, Cristužtanami Yooz Ejpžtanami chica kamzjapa. Nižaza ana zuma kamñinacami, nižaza zmazñinacami, jalla ninaca zakaz ana arajpach wajtquin luzasača. Ninacaqui Cristuž partiquizimi Yooz partiquizimi anapanž cjesača. Tsjii zmazni žoñiqui, tsjii žoñž paata yooz rispitiñi žoñi iratača. ⁶Nižaza ančhucqui ina takunacžtan ana incallskata. Jalla nižta ana wali paañiž cjen Yoozqui nii ana wali paañinaca casticaquičha. Ninacaqui Yooz kuzcama ana kamñiča, antiz Yooz quintra paañiča. ⁷Jalla nižta ana wali paañi žoninacžtan chica anača munazizqui.

⁸Tuquiqui ančhucqui uj paacan ana wal zumchiquizkaz kamatča. Anziqui Jesucristo Jilirž partiquiz cjican, ančhucqui kjanquiz kamča. Jalla nižtiquiztan zuma kamcan kjanquiz kamñi žoñižta cjee. ⁹Kjanquiz kamcan, ančhucqui zuma kamaquičha, nižaza Yooz kuzcama kamaquičha, nižaza lijituma kamaquičha. ¹⁰Čhjul

kamaña Jesucristo Jiliriqúi jutztazaja, jalla nii kamañchiz kamzjapa tjapa kuz tjaa. ¹¹Ana zuma obranaca paazqui ana nekz mitisa. Zumchiquiz ojklayñi žoñinacakazza nižtanaca paaz pecñiqui. Ninacž obranacaqui ana waliž, jalla nii kjanapacha tjeezna ančhucqui. ¹²Zumchiquiz ojklayñi žoñinacaqui chjozaka ana zuma paañiča. Jalla nii paatanac puntuquiztan parlizqui ancha azzucača. ¹³Jalla nižta chjozaka paatanacaqui kjanapacha tjeeztažlaj niiqui, tjappacha zizasacha, ana walipan, jalla nii. Werar Yooz kjanacui čjul paatanacami tjeezkatasača, zuma, ana zuma, nii. ¹⁴Jalla nii puntuquiztan Yooz takuqui tuž cjičan:

“Tjajñi žoñinaca, žaazna ančhucqui. Ticziquiztan žaažtažokaz cjee. Cristuqui ančuca kuzquiz kjanzt'aquičha, tsjii zuma kjanažtakaz”.

¹⁵Jaziqui ančhucqui amayt'aza, jaknužt kamčhaja, jalla nii. Yooz puntu ana zizñinacaztakaz ana kamz waquiziča. Antiz Yooz puntu zizñi žoñinaca irata kamspanž waquiziča.

¹⁶Tii timpuquiz kamñinacaqui ana wali paača. Jalla nižtiquiztan tii timpuquiz žejlcan ančhucqui parti žoñinaca yanapa, zuma kamajo.

¹⁷Anača zumzužtakaz cjee. Antiz Jesucristo Jiliriž pecta kuz tintazniž cjee. ¹⁸Nižaza anača vinžtan licchi cjisqui. Jalla nuž licaž niiqui, zuma kamañquiztan tsjii kjutñi chjichta cjesača. Antiz ančuca kuztan Espiritu Santužtan tsjii kuzziz cjee.

¹⁹Ančhucqui porapat zuma parlaquičha Yooz tawk salmužtan, nižaza Yooz wirsu itsnacžtan. Yoozquin tjapa kuztan itsnaquičha. Nižaza itscan Yoozquin honora tjaa. ²⁰Čjulu watanami Yooz Ejpžquin tirapan

sparaquič cjequičha, učum Jesucristo Jiliriž cjen.

CRIICHI FAMILŁ PUNTU

²¹Jesucristužquin rispitchiž cjen porapatž sirwasaquičha.

²²Maatakanaca, persun luctakž jaru cjee, jaknužt ančhucqui Jesucristo Jiliriž jaru kamčhaja, jalla nižta.

²³Maatakaqui luctakž mantuquiz žejlča, jaknužt icliz žoñinacaqui Cristuž mantuquiz žejlčhaja, jalla nižtača. Icliz žoñinacaqui Cristužtan tsjii curpuchizpanča. Nižaza Cristuqui ninacž ačača. Cristuqui nižquin criichi žoñinaca liwriiča.

²⁴Jaknužt criichi žoñinacaqui Cristuž mantuquiz žejlčhaja, jalla nižta irata tsjii maatakaqui luctakž mantuquiz cjistanča čjulu cjenami.

²⁵Luctakanaca, persun maatakžtan zuma munaza. Jaknužt Cristuqui criichi žoñinacžtan zuma munazičhaja, nižaza ninacž laycu ticztčhaja, jalla nižta irata persun maatakžtan zuma munaza. ²⁶Jalla nižta zuma munazican Cristuqui nižquin criichi žoñinacž laycu ticziča, ninaca zuma kamañchiz cjiskatzjapa. Jalla nižta zuma kamañchiz cjisjapa criichi žoñinacaqui kjaztan ajuntažokaz cjissiča, Yooz taku catokžcu. ²⁷Cristuqui nižquin criichi žoñinacžquiz zuma kamañchiz cjiskatchiča, nižquizpacha zumapankaz ana ujchiz prisintisjapa. Jaknužt tsjii zuma telaqui ana manchichiz, nižaza ana tjot tjotsi, nižaza ana čjul ana walinacchiz žejlčhaja, jalla nižtapan criichi žoñinacaqui Cristuž yujcquiz cjequičha, zumapankaz cjequičha. ²⁸Jalla nižta Cristo irata tsjii luctakaqui persun maatakžquiz zuma munazizpanča. Jaknužt persun curpuquizpacha cuitaznižlaja, jalla nižta persun

maataka cuitaz waquiziča. Persun maatakžtan munazican, persunpacha munazitažokazza. ²⁹Anaž jecmi persun curpujapa quintra paasača. Antiz persun curpuquiz cuitazza, nižaza čhjeriž tjaacha. Cristuqui jalla nižta irataž icliz žoñinacžtan cuitiča.

³⁰Učhumqui icliz žoñinacača, nižaza Cristuž curpu cuntača, yekja yekja cjenami. Jalla nižtiquiztan Cristuqui učhumnacatan cuitiča. ³¹Yooz takuqui tuž cjiča: “Tsjii luctak žoñiqui persun maa ejpžquiztan zarakaquiča, persun maatakžtan zalzjapa. Persun maatakžtan zalžcu, nii pucultanaqui tsjiikaz cjiša”. ³²Cristužquiz criichi žoñinacaqui Cristužtan lucutjnižtakazza. Jalla nižta cjenauqui ch'amača intintazqui. ³³Pero zapa mayni ančhucaquiztan persun maatakžtan zuma munaza, jaknužt persunpachquiz zuma munazaja, jalla nižta. Nižaza maatakaqui persun luctaka rispitsa.

6 ¹Criichi maatinaca, persun maa ejpžquiz caspanča. Jalla nuž cascuqui Yooz pecta kuczmacača. ²Yoozqui tuž mantichiča: “Maa ejpžquiz rispitsa”. Nižaza maa ejpžquiz rispitaquičiž niiqui Yoozqui compromitchiča, tuž cjican: ³“Maa ejpžquiz rispitaquičiž niiqui, ančhucqui waliž kamaquiča, nižaza ažk wata žetaquiča tii yokquiziqui”.

⁴Ejpnaca, ančhucqui maatinacžquiz ana inapankaz žawjwa zjična. Ocjalanacaqui ana wali paaquičiž niiqui, zumžtan chiižinaquiča zuma kamajo. Nižaza Jesucristo Jiliriz tjaajinta tjaajžna.

⁵⁻⁶Piyunanaca, ančuca patrunanacžquiz caspanča, rispitan, nižaza ekscan, nižaza tjapa kuztan. Anača cherankaz c'unchikaz tuczqui niiz kuz wali cjisjapa. Antiz tjapa

kuztan niiztajapa langznaquiča. Jaknužt ančhucqui Yooz kuczmaca tjapa kuztan Cristužquiz sirwičhaja, jalla nuž ančuca patrunanacžquiz sirwasača. ⁷Zuma kuztan langznaquiča, Yooz Jiliržtajapa langztažokaz, ana žoñžtajapaqui. ⁸Ančhucqui zizza, piyunanacami, ana piyunanacami, tjapa žoñinacami Yoozquiztan pactaž cjequiča zuma langztiquiztan jama.

⁹Patrunanaca, ančhuc zakaz piyunanacžtan zumapan cjee. Ana žawjni takunacžtan chiichiya. Jalla tuž cjuñzna: ančhucmi, ančuca piyunanacami, tjappacha arajpach Yooz Patrunž mantuquiz žejlča. Nižaza Yooz Patrunaqui žoñinaca ana illillza.

YOOZQUIN TJURT'IZ PUNTU

¹⁰Jaziqui jilanaca, cullaquinaca, Yooz wali aztan Jesucristo Jiliržquiz tjurt'iñi kuzziz cjee. ¹¹Satanás diabluz incallzpanž pecča. Jalla nižtiquiztan tjapa Yooziž tjaata armanacchiz cjee, tjurt'iñi kuzziz cjisjapa. ¹²Učhum wali azziz quintranacaqui anača žoñinacakaz. Antiz ninacaqui ana wal jilir zajranacača, nižaza ana wal poderchiznacača, nižaza ana wal mantiñinacača. Nižaza tjapa ana wal azziznacača učhum ultim quintranacaqui. Jalla ninacaqui zumchiquizkaz ojklayniča, tii timpuquiz ana walinaca mantican.

¹³Jalla nižtiquiztan Yooz armanaca tanžna, nii ana walinacž quintra tjurt'izjapa tii ana wal timpuquiz. Yooztajapa tjurt'ican tjup kuzziz žela. ¹⁴Jaziqui tii Yooz armanaca tanžna. Nii cinturuna tanzqui tuž cjiča, werar Yooz tawkžtan tjurt'ichi žejlz, jalla niiča niiqui. Nižaza persun curpu atajñijapa arma tanžna. Nii arma tanzqui tuž

cjiĉha, Yooz kuzcamapankaz kamz, jalla niiĉha niiqui. ¹⁵Niżaza jaknužt zultatunacaqui quira zalzjapa zuma zapatu cujtžaja, jalla nuž anĉhucqui liwriiñi taku paljayzjapa tjaczpanĉha. ¹⁶Nekztan tii arma tanžna. Tii armaĉha juc'ant chekanaqui, escudo cjita. Jalla nii arma tanzqui tuž cjiĉha, Jesucristužquin kuzziz kamz, jalla niiĉha niiqui. Jesucristužquin kuzziz cjen, ana wal diabluž quintra tjurt'aquiĉha. ¹⁷Niżaza tii arma žejlĉha. Yooziž liwriita cjisqui tsjii tjup scarchiztakazza, acha ana chjojritžta cjisjapa. Niżaza Espřritu Santuž pajk cuchillu tanžna. Jalla nii cuchilluqui Yooz takuĉha. ¹⁸Espřritu Santuž anĉhuca kuzquiz želan, anĉhucqui Yoozquin tirapan mayiza, niizquin tjurt'ichi cjisjapa. Jalla nuž tjurt'ichi cjisjapaqui, naynay žela, ana llajlli kuzziz cjee. Niżaza tjapa Yooz partiquiz žejlñi žoñinacžtajapa mayizina. ¹⁹Niżaza wejtajapa mayizina, Yoozqui wejr niiz liwriiñi takunaca chii yanapzjapa. Wejrqui tjup kuztan liwriiñi Yooz taku zumpacha paljayz pecuĉha. Jalla

nuž paljayzjapa wejtajapa mayizina. ²⁰Yoozqui wejr cuhanžquichiĉha, niiz puntunaca paljayzjapa. Jalla nuž weriž paljaytiquiztan anziqui wejrqui carsilquiz chawcta želuĉha. Jalla nižtiquiztan wejtajapa mayizina, liwriiñi takunaca tjup kuztan ticlarzjapa, jaknužt wejrqui chiiz waquizuĉhaja, jalla nii.

ŽERZ TAKUNACA

²¹Tíquico jilaqui anĉhucaquin tjapa wejt puntunaca quint'aquiĉha, jaknužt želuĉhaja, niżaza ĉhjulut paa-uĉhaja, jalla nii. Tíquico jilaqui pecta jilaĉha, niżaza wejt zuma yanapñiĉha, Jesucristo Jiliri sirwican. ²²Jaziqui tii jila anĉhucaquin cuhanžcuĉha, wejtnaca puntuquiztan mazinžjapa, niżaza anĉhuca kuznacquiz zumpacha p'ekinchayzjapa.

²³Yooz Ejpžtan Jesucristo Jiliržtan anĉhucaquiz llan kuzziz cjiskatla, niżaza juc'ant zuma munaziñi kuzziz cjiskatla, Jesucristužquin kuz tjaacan. ²⁴Uĉhum Jesucristo Jiliržtan zuma munaziñi kuzziz žoñinacžquiz Yoozqui yanapt'ižquila. Jalla nužoj cjila. Amén.